



ԳԱՐԵԳԻՆ Բ. ԾԱՌԱՅ ՅԻՍՈՒՄԻ ՔՐԻՍՏՈՍԻ,  
ՈՂՈՐՍՈՒԹԵԱՄԲՆ ԱՍՏՈՒԾՈՅ ԵՒ ԿԱՄՕՔՆ ԱԶԳԻՍ  
ԵՊԻՍԿՈՊՈՍԱՊԵՏ ԵՒ ԿԱԹՈՂԻԿՈՍ ԱՄԵՆԱՅՆ ՀԱՅՈՑ,  
ԾԱՅՐԱԳՈՅՆ ՊԱՏՐԻԱՐՔ ԿԱՄԱԶԳԱԿԱՆ ՆԱԽԱՍԵՄԱՐ ԱԹՈՈՈՑ ԱՐԱՐԱՏԵԱՆ  
ԱՌԱՔԵԼԱԿԱՆ ՍԱՅՐ ԵԿԵՂԵՑԻՈՅ ՍՐՔՈՅ ԿԱԹՈՒՂԻԿԷ ԷԶՄԻԱԾՆԻ

ՔՐԻՍՏՈՍԱԻՆՆԳ ՍԻՐՈՅ ՈՂՁՈՅՆ ԵՒ ՕՐՀՆՈՒԹԻՒՆ ՀԱՅՐԱՊԵՏԱԿԱՆ  
ՄԵԾԻ ՏԱՆՆ ԿԻԼԻԿԻՈՅ ԿԱԹՈՂԻԿՈՍՈՒԹԵԱՆ, ՊԱՏՐԻԱՐՔՈՒԹԵԱՆՅ ՀԱՅՈՑ  
ՍՐՔՈՅ ԵՐՈՒՄԱԳԻՄԱՅ ԵՒ ԿՈՍՏԱՆԴՆՈՒՊՈԼՍՈՅ,  
ԱՐՔԵՊԻՍԿՈՊՈՍԱՅ, ԵՊԻՍԿՈՊՈՍԱՅ, ՎԱՐԳԱՊԵՏԱՅ, ՔԱՂԱՆԱՅԻՅ  
ԵՒ ՍԱՐԿԱԲԱԳԱՅ, ԹԵՄԱԿԱՆ ԵՐԵՍՓՈԽԱՆԱԿԱՆ ԺՈՂՈՎՈՑ, ԹԵՄԱԿԱՆ  
ԵՒ ՀԱՄԱՅՆՔԱՅԻՆ ԽՈՐՀՐԳՈՑ ԵՒ ՊԱՇՏՕՆԵԻՅ, ԶՕՐԱՎԱՐԱՅ ԵՒ ԶՕՐԱՅ  
ՀԱՅՈՑ ԲԱՆԱԿԻ ԵՒ ՍԻՐԵՑԵԱԼ ՀԱՄԱՅՆ ՀԱԲԱՏԱՅԵԱԼ ԺՈՂՈՎՐԴԵԱՆ ՀԱՅՈՑ

*«Տէր զօրութիւն ժողովրդեան իւրոյ տացէ  
եւ օրհնեսցէ զժողովուրդ իւր ի խաղաղութիւն»  
(Մաղմ. ԻԸ. 11):*

*Գոհութիւն եւ փառք ենք վերառաքում առ Բարերարն Աստուած,  
որ խաղաղութեան մէջ ենք տօնում Հայոց բանակի 25-րդ տարեդարձը:  
Հայրապետական այսու Կոնդակով օրհնութեան եւ շնորհաւորանքի Մեր  
խօսքն ենք ուղղում մեր յաղթական բանակի քաջասիրտ սպաներին ու  
զինուորներին եւ համայն մեր ժողովրդին:*

*Անկախ մեր պետականութեան փառապանծ զաւակն է Հայոց բանա-  
կը, որ կազմաւորուեց մեր հայրենիքի համար ծանր ու դժնդակ օրերին:  
Մեր ժողովուրդը դիմակայում էր հարձակումներին Հայաստանի սահ-*

մաններում եւ Արցախում պաշտպանում ազատ ապրելու իր իրաւունքը: Պատերազմի, շրջափակման, տնտեսական փլուզումների, գաղթականութեան, ակերածութիւնների, կուտակուած ահուելի դժուարութիւնների պայմաններում մեր ժողովուրդը չզաղարեց հաւատալ, որ, ինչպէս սաղմոսերգուն է ասում, «Տէրն իր ժողովրդին զօրութիւն պիտի տայ եւ իր ժողովրդին պիտի օրհնի խաղաղութիւն պարգեւելով»: Խաղաղ ու ապահով ապրելու ձգտումով ազգիս զաւակները, ապաւինած Աստուծուն, ելան՝ պաշտպանելու մեր նուիրական հայրենիքը եւ մեր հայրերի ստեղծած ժառանգութիւնը: Հայրենասէր սրտերի բոցից մեր բանակը ծնունդ առաւ ինչպէս օր առ օր մեծացող Սասունցի Դաւիթ, ամրապնդուեց ու զօրացաւ մարտերում՝ իր յաղթանակներով զօրացնելով նաեւ խաղաղ կեանքի յոյսն ու լաւատեսութիւնը մեր ժողովրդի:

Այսօր հպարտութեամբ ենք անդրադառնում Հայոց բանակի 25-ամեայ պանծալի ուղուն, յաղթանակներին ու ձեռքբերումներին: Տիրոջ օգնականութեամբ ամրացուել են մեր սահմանները, ազատագրուած է Արցախը, որը, հակառակ թշնամու ամենօրեայ սադրանքների, չէնանում է ու բարգաւաճում: Մեր բանակը շարունակում է երաշխաւորել մեր հայրենիքի ապահովութիւնը եւ առաւել լուսաւոր ապագան՝ փառքով պսակելով իր ծառայութիւնը հայրենիքին: Նախորդ տարի՝ ապրիլեան պատերազմի օրերին, ականատես դարձանք քաջարի ոգուն եւ սխրանքներին մեր հերոս զաւակների, երբ մեր բանակը խափանեց հակառակորդի դաւադիր ծրագրերը եւ վերստին ապացուցեց, որ մշտապէս պատրաստ է՝ պաշտպանելու մեր հայրենիքը, արցախահայութեան ազատ ապրելու իրաւունքը:

Աղօթքով ենք յիշում Մեր զաւակներին, ովքեր նահատակութեան պսակն ընդունեցին՝ յանուն մեր ժողովրդի խաղաղ կեանքի ու լուսաւոր ապագայի: Նրանց անմահ անունները միշտ պիտի ապրեն մեր ժողովրդի հոգում՝ մեր պատմութեան խնկելի հերոսների շարքին, ովքեր իրենց անկեղծ հայրենասիրութիւնն ու ազգասիրութիւնը վկայել են իրենց կեանքով ու գործերով:

Այս յիշարժան օրը հայրական Մեր ջերմ սէրը, գնահատանքն ու օրհնութիւնն ենք բերում մեր փառապանծ բանակի զօրականներին, որ մշտարթուն ծառայութեամբ ապահովում են անդորրութիւնը մեր երկրի: Մեր գնահատանքն ու օրհնութիւնն ենք բերում բանակի կայացման գործում իրենց աւանդն ունեցող բոլոր երախտաւորներին, այսօր բանակի զօրացմանը աջակցողներին եւ բանակում ծառայող հոգեւոր սպասաւորներին, ովքեր իրենց արժանաւոր նպաստն են բերում մեր զաւակների հաւատաւոր, պայծառ ու արի նկարագրի կերտմանը:



ՀՀ Պաշտպանության նախարարությունը  
Հայոց բանակի կազմավորման 25-ամյակի առիթով  
մի շարք հոգևորականների պարգևատրեց  
«Անդրանիկ Օզանյան» և «Գարեգին Նժդեհ» շքանշաններով





Ն. Ա. Օ. Տ. Տ. Գարեգին Բ. Ամենայն Հայոց Կաթողիկոսի սրբատառ կոնդակով  
Հայոց բանակի կազմավորման 25-ամյակի առիթով  
մի շարք զինվորականներ պարգևատրվեցին Հայ Նկեղեցու  
«Մուրր Ներսես Շնորհալի» պատվո շքանշանով

Հայոց բանակի սիրելի փառապանձ զորաւարներ ու զինուորներ, դուք քաջ զխտէք, որ բանակն ուժեղ է ոչ միայն զէնք ու զինատեսակներով, այլ նաեւ՝ ոգով ու պատրաստութեամբ: Ձեր սէրը Հայրենիքի Հանդէպ, ծառայութեան մէջ ձեր նախանձախնդրութիւնը, միմեանց Հանդէպ ազնիւ վերաբերմունքն ու հոգածութիւնը, ձեր հոգին զօրացնող հաւատքն ու յոյսը նոյնպէս ձեր զէնքերն են: Մաղթում ենք, որ մեր բանակը միշտ լինի Հայրենասիրութեան դարբնոց, աննկուն պաշտպանը մեր ժողովրդի արդար իրաւունքների ու ամեն առաքինութեան օրինակ, եւ մեր կեանքում միշտ ամուր լինեն յոյսն ու քաջալերութիւնը եւ հաւատքը՝ աներկբայ, որ «Տէրն իր ժողովրդին զօրութիւն պիտի տայ եւ իր ժողովրդին պիտի օրհնի խաղաղութիւն պարգեւելով»: Աղօթք ենք վերառաքում, որ Աստուծոյ Սուրբ Աջը Հովանի եւ պահպան լինի ձեզ եւ պարգեւի ապահով ծառայութիւն Հայրենեաց խաղաղ եղբայրներում: Թող ձեր հաւատքը, որպէս վահան ամրութեան, ձեզ պաշտպանի փորձութիւններից ու նեղութիւններից եւ Աստուծոյ շնորհները առատացնի ձեր կեանքում:

Մեր յորդորն ու պատգամն ենք յղում Հայրենիքում եւ սփիւռքում գործող ազգային Հաստատութիւններին, եկեղեցական ու թեմական կառույցներին եւ Քրիստոսասէր մեր ողջ ժողովրդին՝ աննուազ հետեւողականութեամբ զօրակցելու Հայոց բանակին եւ քաջալերելու մեր զօրաց ու զօրականաց իրենց Հայրենանուէր ծառայութեան մէջ, որպէսզի շարունակենք Հպարտանալ Հայոց պանծալի բանակով եւ Հիւսենք փառքը նրա յաղթանակների ու սխրանքների:

Թող Բարձրեալն Աստուած առատապէս օրհնի մեր երկիրը, խաղաղութիւն ու զօրութիւն պարգեւի համայն մեր ժողովրդին՝ կառուցելու շէն ու բարգաւաճ մեր Հայրենիքը եւ իրագործելու ազգային մեր իղձերը:

Շնորհք, ալր և խաղաղութիւն Տեստն մեզոյ Յիսուսի Քրիստոսի և յիցին ընդ ձեզ և ընդ ամենեւեան. ամէն:

Օրհնութեամբ՝

ԳԱՐԵԳԻՆ Բ.  
ԿԱԹՈՂԻԿՈՍ ԱՄԵՆԱՅՆ ՎԱՅՈՅ